




Kamis, 29 Oktober 2020

Ogen: 2 Korinti 9:7-8



Mere Alu Ukur Meriah



Perpulungen Korinti pelit. Lain ras Perpulungen Tesalonika ras Perpulungen Pilipi. Adi perpulungen enda duana rusur ipujiken Paulus erkiteken mediate nandangi kalak si deban. Tupung lit kiniseran nandangi Perpulungen si lit i Judea maka pepulungen enda alu ergiah-giah ras ukur meriah muat bagin nehken penampatna. Adi secara ekonomi maka bayaken nge perpulungen Korinti asa perpulungen si dua enda. Tapi secara kiniteken belinen ndauh kiniteken kalak enda asa Perpulungen Korinti.

Perpulungen Korinti enggo menaken mpepulung penampat man Perpulungen i Judea. Tapi la eteh kai sabapna ngadi dahin enda. Arah surat enda ijemba Paulus mulihi gelah ersuruh ukur kalak enda nerusken dahin si enggo ibenakenna i bas paksa si lewat. Tapi pemindon Paulus gelah idahiken kalak enda dahin alu meriah ukur, ula alu jungut-jungut entah terpaksa. Mere kepe banci alu jungut-jungut banci alu meriah ukur. Kalak si mere alu jungut-jungut la kepe jadi pasu-pasu. Duit enggo ndarat janah la ka ngena ate Dibata. I bas tengah kegeluhenta banci jadi kita pe pernah mere alu jungut-jungut entah terpaksa si akap. Apai nari ka i bas lelang-lelang banci maun bagi ijebak juru lelang kita piah si turiken si la bagi ukurta. Bage pe banci ka i bas adangen-adangen perpulungen, lanai alu ukur meriah si akap merekenca, apai nari ka masa covid'19 bagenda. Sendah ipersingeti Dibata man banta maka tupung kita mere maka si lakoken lah alu ukur meriah. Kalak si mere alu ukur meriah maka lit janji Tuhan i jenda maka ngasup IA masu-masu kita alu pemereNa si sampur.

Adi si imani arah kai pemerenta e eme pasu-pasu i bas Dibata nari. La kita metangkang mere ras nampati. Bagi selang adi sada ipitut arah teruh lanai reh das nari, pasu-pasu Tuhan e pe ula si pitut gelah tetap maler pasu-pasu e man banta.